

Ilanngussaq E



Allakkiag Notat

Oqaatigisassat

Brevdato: 31-10-2019
Sags nr. 2019 - 4228
Akt id. 11998939

**Tallimangornermi ulloq 1. november 2019 nal. 10.30 ataatsimiittarfik Lars
Chemnitzimi Aningaasaqarnermut Akileraartarnermullu
Ataatsimiititaliamik isumasioqateqarneq**

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

**Pineqartoq: AIS2020 – Aappassaaneerinninnermi Naalakkersuisut
allanguutissatut siunnersuutaat (UKA2019/7)**

1. Aallaqqaammut ataatsimiititaliaq isumasioqatigiinnermut uunga aggersaaneranut qujassuteqarfigissavara. Isumasioqatigiinnermut sivikitsuaqqamik siumut piffissaliilluni aggersaasoqarpoq, taamaammallu ataatsimiititaliamut oqaatigisassat suli naammassisinnaanngilavut, taakku kingusinnerusukkut nassiunneqassapput.
2. Ataatsimiititaliaq tulliuuttunik apeqquteqarpoq, taakkullu isumasioqatigiinnermi uani akissavakka:

Ataatsimiititaliap apeqqutai:

Apeqqut 1

Allanguutissatut siunnersuut nr. 10.

Missingersuutinut ilanngussami allanguummut suna tunngaviua?

Akissut:

Apeqqutip akissuteqarfiginissaanut Ilinniartitaanermit, Kulturimut Ilageeqarnermullu Naalakkersuisoqarfimmit ilassutissanik pissarsisoqarpoq, taakkulu allanguutissatut siunnersuut Elite Sport Greenland (ESG) siunnersuutaanik aallaaveqartumik suliarineqartoq paasissutissiissutigaa. Nunanut allanut unammisartut sungiusaasui allaffissornermut piffissartornatik ingerlaavartumillu sulinnermut annaasanik matussutissanik qinnuteqaasiornatik timersortartut sapinngisamik pitsaanerpaamik sungiusarnissaannik

aallussinnaangorlugit eqqissillutik sulisinnaalernissaat allannguutissatut siunnersuutip siunertaraa. Tamanna ESG-p isumaa naapertorlugu nunanut allanut unammisartunik nukittorsaassaaq sapinngisamillu pitsaanerpaanik piginnaasaqalersitsissaaq. Peqatigisaanillu timersortartut sulinermi annaasaminnik sulit matussutissarsisassapput.

Apeqquut 2

Allannguutissatut siunnersuut nr. 23.

Missingersuutitut ilanngussami allannguummut suna tunngaviua?

Akissut:

Apeqqutip akissuteqarfiginissaanut Ineqarnermut Attaveqaqatigiinnermullu Naalakkersuisoqarfimmit ilassutissanik pissarsisoqarpoq. Matumani oqaasertatiguiinaq allannguiq imminermini aningaasaliissutinik kinguneqaateqanngitsoq pineqarpoq. Naalakkersuisoqarfiup ugguuna allannguinikkut Mittarfeqarfiit akigititaasa nutartikkat atulersinneqarnerisa kinguneqaataat erseqqissarniarpaq. Pissutsit taakku aningaasaliinikkut AIS20-mi naqitami ilanngunneqareerput, naalakkersuisoqarfiilli tungaanit oqaasertaliussatigut taakkunanga erseqqissaanissaq kissaatigineqarpoq. Taamaamat immikkoortumi Mittarfeqarfiit akigititaat nutaat Peqqinnissaqarfiup aningaasartuuteqarnerulerneranik malitseqartut, kiisalu Air Greenlandimut sullissinissamik isumaqatigiisummut akiliutit qaffanneqartut taamaattorli Peqqinnissaqarfik Air Greenlandilu taakkununga taartisisinneqartut erseqqissarniarneqarpoq.

Apeqquut 3

Allannguutissatut siunnersuut nr. 25.

Takussutissiaq ilanngullugu nassuineqartoq erseqqinnerusumik itisilerneqassasoq ataatsimiititaliamit kissaatigineqarpoq. Suliassat immikkoortiternerisa suliassallu allaaserinerisa imarisaannut takussutissiaq sanilliunneqassaaq.

akissut:

Apeqqutip akissuteqarfiginissaanut Ineqarnermut Attaveqaqatigiinnermullu Naalakkersuisoqarfimmit ilassutissanik pissarsisoqarpoq. Matumani 50/50-imik tapiisarnermik aaqqissuussineq pineqarpoq, tassungalu tunngatillugu ukiuni aningaasanut inatsiseqarfinni tamani kommunit kissaataannik piniartoqarpoq.

Aallaqqaammut utoqqarnut immikkoortuni marloqiusamik aningaasaleeriaaseq naapertorlugu pilersaarusiornermut tapiissuteqartoqarsinnaavoq. Tamatuma kingorna sanaartornermut namminermut tapiissuteqartoqarsinnaanera isummerfigineqartarpoq. Taamaattoqartillugu suliniut 996.44.048 Nutaamik sanaartugassanut iluarsagassanullu aningaasaliissutit aningaasat nuunneqartarput. AIS2020-mut sanaartornissamut qinnuteqaatinik tigusaqartoqanngilaq, taamaallaat pilersaarusiornernut. Suliniutini tamani suliniutinut nassuiaatit kommunit suliniutinut nassuiaataannit tigusaapput.

Apeqquut 4

Allannguutissatut siunnersuut nr. 28.

Takussutissiaq ilanngullugu nassuineqartoq erseqqinnerusumik itisilerneqassasoq ataatsimiititaliamit kissaatigineqarpoq. Suliassat immikkoortiternerisa suliassallu allaaserinerisa imarisaannut takussutissiaq sanilliunneqassaaq.

Tassunga atatillugu suliassap 996.24.116 allaaserinerani allanngortoqarpa?

Akissut:

Apeqqutip akissuteqarfiginissaanut Ineqarnermut Attaveqaqatigiinnermullu Naalakkersuisoqarfimmit ilassutissanik pissarsisoqarpoq, taakkulu 996.24.116 suliniutip nassuiaataa allannguuteqanngitsoq paasissutissiissutigaaq. Taamaalilluni suliniummut nassuiaat 2020-mut Aningaasanut Inatsisissatut Siunnersuummi naqitami ilanngunneqartumut sanilliullugu allannguuteqanngilaq.

2021-mi 2022-milu 20 mio. kr.-t AIS2020-mi suliniummut kukkusumut immikkoortinneqarnerat matumani pineqarpoq, tamannalu maanna allannguutissatut siunnersuutikkut ugguuna aaqiivigineqarneqarpoq. Taamaalillunilu aningaasaliissutit maanna suliniummi eqqortumi, eqqortumik suliniummut nassuiaatitalimmi takuneqarsinnaalissapput.

Taamaalilluni annikinnerusumik teknikikkut aaqiineq pineqarpoq.

Apeqquut 5

Allannguutissatut siunnersuut nr. 30.

Suliassanit allanit arlalinnit Nuummi suliassaq 060.31.033-mut aamma sumiiffinni assigiinngitsuni suliassaq 996.32.134-mut aningaasanik nuussisoqartoq ataatsimiititaliap paasivaa.

Takussutissiaq ilanngullugu nassuineqartoq erseqqinnerusumik itisilerneqassasoq ataatsimiititaliamit kissaatigineqarpoq. Suliassat immikkoortiternerisa suliassallu allaaserinerisa imarisaannut takussutissiaq sanilliunneqassaaq. Tamatuma saniatigut atuutilerfissatut nalunaarneqarsimasut itisilerneqarnissaat ataatsimiititaliamit kissaatigineqarpoq.

Akissut:

Takussutissiivik suliniutinik ataasiakkaanik aningaasaliissutissatut kissaatinik, suliniutinilu aalajangersimasuni erseqqinnerusumik nassuiaatit aningaasanut inatsisissatut siunnersuummi naqitam, kiisalu allannguutissatut siunnersuummi nassuiarneqartut, Ineqarnermut Attaveqaqatigiinnermullu Naalakkersuisoqarfiup paasissutissiissutigaa. Allannguutissatut siunnersuummi aningaasaliissutini allannguutit kisimik takutinneqartut, suliniutinilu aalajangersimasuni allannguutit eqqaaneqartut, taamaalillunilu erseqqinnerusumik paasinninnissami allannguutissatut siunnersuut aningaasanut inatsisissatut siunnersuummut naqitamut namminermut sanillersuunneqarnissaa pisariaqartoq maluginiaqquneqarpoq.

Allannguutissatut siunnersuummi uani aningaasat sanaartornermi suliniutinit arlalinnit, atuinikinneruffiullutik naammassineqartunik suliniummiluunniit namminermi allatut ililluni aningaasaliissutissanik pisariaqartitsinerup apparneqarsinnaaffiini, soorlu nussorneqarput sanaartornermi suliani pitsaasunik neqeroortoqarneratigut. Aningaasat atorneqartussaajunnaartut taakku Nuummi blok 1-ip isaterneranik suliniummut, kiisalu piffinni assigiinngitsuni inissianik sanaartornermut suliniutinut nuunneqarnissaat qinnutigineqarpoq. Kingullermut tunngatillugu nuna tamakkerlugu inissianik pilersaarusionerme sanaartornermilu aningaasaliissutit atorneqarsinnaanerattut, taamaattoq taakku suli sanaartugassatut suliniummut aalajangersimasumut nuunneqannginnerattut paasineqassaaq.

Atulerfissat ullui suliniutip ingerlanneqarnissaani maanna toqqammavigineqartoq naapertorlugu pinissaa tunngavissaatinneqarpoq. Suliniutit ingerlaavartut pineqartillugit – tassa suliassat ataavartumik suliariumannittussarsiuunneqartut minnerusunullu – ullut atulerfissat peerneqarnissaat qinnutigineqarpoq, taamaattoqarneranimi ulloq eqqortoq pineqarneq ajormat. Taamaaliornikkut suliniummut nassuiaatip piviusorsionerumik takussuteqartinnissaa kissaatigineqarpoq.

Apeqqut 6

Allannguutissatut siunnersuut nr. 43.

Aningaasaliissutini allannguutit qanoq nassataqarpat?

AS 41-44-p akornanni ataqatigiinneq erseqqinnerusumik itisilerneqassasoq ataatsimiititaliamit kissaatigineqarpoq.

Akissut:

Umiarsualiveqarnermi oqartussaaneq pillugu isumaqatigiissutit isumagineqarnissaannut aningaasaliissutaareersut, immikkut konto pingaarnermut 72.22.01-imut nuunneqarnissaat siunnersuutigineqarpoq, tamannalu allannguutissatut siunnersuutip nr. 44-mi siunertaavoq. Peqatigisaanik allannguutissatut siunnersuummi 41-mi sulisumut aningaasaliissutit konto pingaarnermut 72.20.02-mit konto pingaarnermut 72.20.07-imut nuunneqassapput.

Tamanna aningaasaliissutissatut immikkoortinneqartut ersarinnerulersinneqarnissaanik siunertaqartoq Ineqarnermut Attaveqaqatigiinnermullu Naalackersuisoqarfiup paasissutissiissutigaa.

Ataatsimut isigalugu Ineqarnermut Attaveqaqatigiinnermilu Naalackersuisoqarfimmi suliassanut nuussinermut tunngatillugu aningaasaliissutini nuussineq pineqarpoq. Taamaaliornikkut ilaatigut umiarsualiveqarnermut immikkoortumi sanaartugassat 2020-mit pisaanerusumik isumagineqarnissaat Naalackersuisoqarfiup naatsorsuutigaa.

Apeqqut 7

Allannguutissatut siunnersuut nr. 45.

Aningaasaliissutini allannguutit qanoq nassataqarpat?

Akissut:

Apeqqutip akissuteqarfiginissaanut Ineqarnermut Attaveqaqatigiinnermullu Naalackersuisoqarfimmit ilassutissanik pissarsisoqarpoq, taamaalillunilu allannguut ilaatigut Namminersorlutik Oqartussat inissiaataanni inissianut inoqanngitsunut aningaasartuutit annertusinissaannik ilimagisaqarnermik takutitsisuusut paasissutissiissutigineqarpoq. Inissiat arlallit inissiani, sinneqartooneq, ilaatigullu pitsaannginnerat pissutigalugu ilaannakortumik atornerqarput, taamaammallu inissiap tamakkerluni qimanneqarnissaata tungaanut suli inissianut inoqanngitsunut aningaasartuutit isumagineqartartussaallutik. Naalackersuisoqarfik INI A/S peqatigalugu aningaasartuutit taakku appartinniarlugit suliniutinik aallartitsivoq.

Apeqqut 8

Allannguutissatut siunnersuut nr. 49+50.

Pisariillisaanermik suliniut ERP sivitsulersumik ingerlasoq qaqugu naammassineqarsinnaasutut naatsorsuutigineqarpa?

Akissut:

Allannguutissatut siunnersuummi nr. 50-imi oqaatigineqartutut ERP-mik suliniut 2020-p naanerani naammassineqarsimassasoq Naalakkersuisut ilimagaat.

ERP-mik pilersuisumik isumaqatigiissut 2016-ip qiteqqunnerani atsiorneqarpoq, piffissallu paasinarsisitsiffiusup pereernerani atulersitsineq 2017-ip qiteqqunnerani Kommuneqarfik Sermersuumi allartinneqarpoq, januar 2018-milu kommunimi tamakkiisumik atorneqalerpoq. Kingullermik Namminersorlutik Oqartussat ERP atuleraapat, ullorlu 1. november 2019 Qeqqata Kommuniani atorneqalissaaq. Kommunini sinneruttuni pingasuni Akileraartarnermullu Aqutsisoqarfimmi 2020-p ingerlanerani ingerlaavartumik atuutilersitsinerit ingerlanneqassapput, taamaammallu ERP-mik suliniut tamarmiusoq 2020-p naanerani naammassissasoq ilimagineqarpoq. Taamaattoq atortorissaarummut immikkut tapiliussat ineriartortinneqarlutillu nalimmassarneqartarnissaat pisariaqartinneqassagunarpoq, aamma ukiuni aggersuni, soorluttaaq ilaatigut ilinniartitsinerit malitseqartitsinerillu aamma ukiuni aggersuni pisariaqartinneqarumassasut.

Apeqqut 9

Allannguutissatut siunnersuutit uku aningaasalersornissaannut Naalakkersuisut qanoq naatsorsuutiginnippat?

Akissut:

AI2020 isertitat aningaasartuutillu oqimaaqatigiisitsisoq akuerineqassasoq Naalakkersuisut suli erseqqissumik anguniarpaat. Aappassaaneerinninnermut Naalakkersuisut allannguutissatut siunnersuutitut saqqummiussaata akuerineqassappat, ukiuni aningaasanik inatsisiliorfiusuni 2020-2023 tamakkerlugu 70,6 mio. kr.-nik amigartoortoqassaaq. Tamanna agguaqatigiissillugu ukiumut 17,5 mio. kr.-nik amigartooruteqarnermik naleqarpoq. Taamaammatt pingajussaaneerinninnissami missingersuutit pisariaqartumik oqimaaqatigiissinnissaat piviusorsioortoq naliliutigineqarpoq. Maannakkuugallartoq tamatuma anguneqarsinnaajumaarneranut Naalakkersuisut suli erseqqissumik ilimagisaqanngillat, sulimi aningaasanut inatsit pillugu partiinik isumaqatiginninniarnert naammassineqanngillat. Taamaaliornermilu

suli isertitat aningaasartuutillu sunnerneqarsinnaapput. Tamatuma saniatigut Akileraartarnermut Aqutsisoqarfik aningaasarsiornerup suli qaffasittuarnera tunuliaqutaralugu iluanaarutisianik annertuliinissaq siunertaralugu, akileraarutini akitsuutinillu ingerlaavartumik akilikkanik misissuileruttorpoq. Taamattaaq ukioq manna raajartassanut siunnersuineq utaqqinneqarpoq, taannalu 2020-mi raajanut TAC-mut sunniteqassaaq. Inatsisitigut piumasqaataasunik aningaasartuutitut tunngatillugu maannakkuugallartoq ukiumut 3 mio. kr.-t ataallugit missingersuutitigut annikitsumik pitsanngoriaateqartoqarpoq, taakkulu pingajussaaneerinninnermut allannguutissatut siunnersuutitut ilanngunneqassapput.

Apeqqut 10

Isaterinnermut tapiissutit konto pingaarnermut immikkoortinneqarnissaannut Naalakkersuisut qanoq periarfissaqarsoraat?

Akissut:

Apeqqutip akissuteqarfiginissaanut Aalisarnermut, Piniarnermut Nunalerinnermullu Naalakkersuisoqarfimmit ilassutissanik pissarsisoqarpoq. Aaqjissuussineq eqaatsoq maanna atorneqartoq naapertuuttuusoq Naalakkersuisut isumaqarput, aningaasammi qinnuteqaatit ingerlaavartut tunuliaqutaralugit atorneqartarput, eqaatsumillu periuseqarneq taanna taamaalilluni konto pingaarnermi 50.06.50 Aalisarnermut aningaasaliissutitut immikkoortitat aningaasat immikkoortinneqartut naapertuuttumik atorneqarnerannut qulakkeerinneqataavoq. Taamaammat aningaasat immikkoortunngortinneqarnissaannut pitsaaqutaasunik Naalakkersuisut takujuminaatsitsipput.

Apeqqut 11

Konto pingaarnermut 64.16.04-mut oqaasertaliussaq nr. 2 suli pisariaqartinneqartuutussatut Naalakkersuisunit isigineqarpa? Tamanna qanoq iluaqutissartaqarpa?

Akissut:

Apeqqutip akissuteqarfiginissaanut Inuussutissarsiornermut, Nukissiuuteqarnermut Ilisimatusarnermullu Naalakkersuisoqarfimmit ilassutissanik pissarsisoqarpoq. Konto pingaarnermi atuinerussutini atuinikinnerussutinilluunniit ukiumut aningaasanut inatsiseqarfimmut tullermut Naalakkersuisut nuussisinaanerannik oqaasertaliussat piginnaatitsipput, tamannalu assersuutigalugu ujarassiornermi ilisimatusarnikkut misissuinerunik

qaffasissumik pitsaassuseqartunik uuliamik isumalluutunik ilisimasat qaffassarneqarnissaannik siunertaqartunik ingerlatsinernut atatillugu aningaasaliissutunik pitsaanerpaamik atuinissamik qularnaarinissamut pingaaruteqarpoq. Misissueqqaarnerit taamaattut ukiukkaartumik ullorsiutunik malinnittuaannanngillat, assersuutigalugulu silap qanoq inneranik aqunneqarsinnaasarlutik, taamaammallu suliniutit ukiunut aningaasanut inatsisisarfiusunut siaarnissaat pisariaqarsinnaasarluni.

Uuliamik isumalluutunik ilisimasaqarneq nunatta uuliamik isumalluutaasa nittarsaannissaanni pingaaruteqarluinnartuuvoq, taamaalillunilu orsussanik imerpaldasunik immikkoortup nunatsinni aningaasarsiormermit sukarsuanngorlugu ineriartortinnissaanik, kiisalu orsussat imerpaldasut Kalaallit Nunaanni aningaasaqarnerup pitsaasumik ineriartortinneqarneranut suliffinnillu nutaanik pilersitsinermut ilapittuinissaannut Naalakkersuisut anguniagaasa piviusunngortinneqarnissaanut pingaaruteqarlutik.

Apeqqutit allat:

Apeqqut 12

Qeqqata Kommuniata allagaa ilanngunneqartoq oqaaseqarfigeqqullugu Naalakkersuisut qinnuigineqarput, tamatumani aningaasanut inatsimmut kingunerisassat immikkut pingaartinneqassapput

Akissut:

Naalakkersuisut ataatsimoorlutik Qeqqata Kommuniata allagaanik oqaloqatigiissuteqarsimanninnerat erseqqissarneqassaaq. Taamattaq Ineqarnermut Attaveqaqatigiinnermullu Naalakkersuisup suliamut tunngasumik oqaatigiumasaanik pissarsinissamut piffissaqartoqarsimannigilaq.

Ataatsimulli isigalugu ukiuni arlalinni Qeqqata Kommuniata attaveqaatitigut suliniutit allakkamini taasaasa ineriartortinnissaat misissorneqarnerallu Naalakkersuisut Qeqqatalu Kommuniata suleqatigiissutigimmatigit paasissutissiissutigineqassaaq. 2019-mullu aningaasanut inatsit pillugu isumaqatigiissut naapertorlugu maanna suliniutit imminut akilersinnaassusaat misissorneqarpoq. Misissuinerit taakku pilersaarusiornissamut toqqammaviliissapput. Maannamut siunertarineqarsimavoq misissueqqissaarnerit 2020-mi qaammatit pingasut siulliit ingerlaneranni piariissasut ilimagineqartoq, maannakkorpiarluni ilisimatinneqarpunga Kangerlussuup siunissaa pillugu suleqatigiissitaq ippassaq Kangerlussuarmi ataatsimiissimasoq, tassanilu suleqatigiissitaq isumaqatigiittoq suliap ingerlanneqarnera siunnersortinik avataaniittunik suleqateqarnikkut siuarsarneqassasoq. Tassani siunertarineqarpoq

suliniutip aningaasaqarnermut ingerlanneqarneranullu tunngavigisat akueriuminartumik qulakkeerneqarnissaat. Ilisimatinneqarpunga ataatsimiinneq pitsaasumik ingerlanneqarsimasoq, tamannalu ajunngitsutut isigalugu. Taamatullu iluarinartippara suliassap siuarsarnissaa pisariaqartinneqartoq isumaqatigiittoqarmat. Tamannalu naalakkersuisooqatigiinnissamik isumaqatigiissutitsinni Kangerlussuup siunissaa kommuni suleqatigalugu ingerlanneqarnissaanut naapertuummat.

Tassunga atatillugu aamma eqqaasissutigissavara Kangerlussuarmi umiarsualivissap sananissaanut pilersaarut maanna ingerlanneqarmat. Konto pingaarnermi 87.73.12-imi pilersaarummut tassunga 4 mio. kr.-t immikkoortinneqarmata.

Taamaalillunga erseqqissaqqikkusuppara Naalakkersuisut Kangerlussuup ineriartortinnissaanut suli periarfissaqartoq isumaqarmata.

Neriuppunga Ataatsimiititaliap apeqqutai taamaalillutik akineqartut.

Inussiarnersumik inuulluaqqusillunga


Vittus Qujaukitsoq